

FASNACHT 2026



EWIGI OPTI-MISCHE

Sujet

NEUTRAL? – EGAL!

oder

**Mir sinn neutralisiert –
solang s fir uns rentiert**

Was mir mit Stolz und zfriiden alli gspyyre:
S git uff dr ganze Wält kai soon e Natioon,
wo me sich sälber ganz zue Rächt deerf fyre,
und zwoor syt männiger Generatioon,
als Volgg, vo Mentschefrindinne und -frinde,
wo Harmony uff unsere Äärdgrais bringt,
wo alli Velgger zämme ka verbinde
und bständig mit dr Friidensfaane winggt.
Kurzum, mir saage s gäärn und unumwunde:
Ai Bligg uff unser Ego, und me gseet:
Mir Schwyzer hänn s jo aigedlig erfunde:
Nämmlig die eewigi NEUTRALITEET.

So, wie mer unser Land vo Senne kenne,
isch s, wie me waiss, syt ee und jee esoo,
dass mir is d Finger joo nit wänn verbrenne
und nit zue irgend ere Mainig stoo.
Mer steen, wo s goot, paraat und frooge nit.
Mer hälfen iberaal und gäärn und guet,
vor allem denn, wenn s ebbis z hoole git
und wenn s is au nit wyter steere duet.
Das kenne mer jo scho vo alte Zytte:
D Ryslaifer hänn scho gschleegeret und killt,
emol uff dääre und emol uff sällere Syte.
D Hauptsach, dr Sold het iire Seggel gfillt.

Und hitte, won is die Europa-Fritze
Vo Brissel bständig so umgaarne wänn,
do mien mer is scho vaterländisch schitze.
S isch guet, dass mer no Hellebaarde hänn.
Zwoor, wens muess sy, denn baut me
villicht Muure,
wie s unsere Muurer z China ääne leert.
Doch, wenn dr Putin und dr Trump dien luure,
denn streggt me d Hand us und me fyylt
sich geert.
Fir s Oval Office schyycht me kaini Koschte,
eb Schoggi, Uure, Gold, s isch ganz egal.
Und ain verköpplet sich im rooten Oschte.
E däawääg isch und blybt me scheen neutral.

Isch me punggto neutral ganz bsunders lischtig,
kennt men im Bundeshuus e guete Drigg,
denn unseri Munitioons- und Waffe-Rischtig
isch allewyyl no gfroggt zem guete Gligg.
So isch me gäärn uff alli Syte gfellig,
vom Noochen Oschte bis uff Afrikaa.
Und d RUAG liiferet uff jeedi Bstellig.
Wo s noochhäär wyter goot, goot uns nyt aa.
Das waiss bi uns jo schliesslig wirgglig kaine,
drum isch s is ebe wuurscht, dasch ganz normal.
Ganz anderscht ligt dr Fall mit dr Ukraine.
Deert hilft me nit. Deert blybt me scheen neutral.

Me mischt sich nit in fremdi Händeleie
Das gheert sich nit. Doo halte mir is draa.
Do kennt jo unser Renommee verheie.
Was geen uns denn die Wältgrieg aa? ...
Die solle sich doch sälber arrangiere.
Mir luege us dr gschitzte Wärggstatt zue.
Solang no d Waffe-Schmitti ka floriere
und d UBS no dooblybt, hämmer Rue.
Und däawääg blybe mer, zem s nomol saage,
im Friidens-Ranking wältwynt beschti Waal,
mit wysser Weschte und mit wyssem Graage,
und irgendwie ebe totaal neutral.

Me bsuecht dr ganz Ladäärne-Schatz
am Zyschtig uff em Minschterblatz.

Dr Sunntig no dr Faasnacht (1. Meerz)

sottscht notiere

zem noonemoole d Faasnacht zelebriere:
Denn ka me nämmlig ab de Fimfi zoobe
e «Zeedel-Lääsede» im Loonhoof oobe
im BaseldytscheBiini-Käller gniesse.
Au Dyy Bsuech däät me bstimmt no seer

bigriesse.

Pfyffer- und Drummlerschuel vo de
Glaine Opti-Mischte

Zem frie ins Faasnachtslääbe starte
hänn mir e stolzi Jungi Garde.
Deert leert me Drummle oder Pfyffe
und Baschtle oder Väärsli schlyffe
Mer hänn dr Plausch. S git vyyl zem Lache.
Kumm doch mit uns go Faasnacht mache!
Debby Cron, Obfrau vo de Glaine Opti-Mischte
glaini@opti-mischte.ch